

四庫全書

集部

欽定四庫全書

梅溪前集卷十八

宋 王十朋 撰

青詞

還醮

荷洪造之無私微生有托痛雙親之不見遺願猶存德
思報於難忱情尤深於罔極輒殫悃悞仰叩高明竊念
臣昔在先臣時為大觀當年齡之及壯念嗣續之未生

虔發精衷哀投大道諾列宿真官之醮繪九天仙使之
容誠果達於杳冥應幾同於影響躬生三子目見諸孫
嗟聖恩之未酌俄人事之已變先人奄棄母氏繼亡由
微臣罪逆之深致先志因循之久凡歲星之屢易猶心
願之未償茲集羽流欽修醮式薄奉蘋蘩之薦聊伸豺
獮之誠仰祈上帝之是臨俯異衆真之咸集釋亡者九
泉之累願遂超昇宥臣門百指之愆永資覆育

代道士薦師

稽顙投誠仰瀆高明之聽剝肝瀝血俯陳哀痛之詞恭
憑三界之妙香上徹九霄之仙路庶通悃愫曲賜憫憐
伏念臣頃以先師遽捐浮世莫救已亡之命徒懷罔極
之恩嗟日月之不居痛神魂之何在追念平生之出處
恐貽造物之譴誅雖占籍為羽流尚宅身于塵網粗植
膏腴之業妄為金穀之謀寄口腹於羶葷有傷物命留
情性於麴蘖致喪天真不能辟穀於山林况復結廬於
田里稔茲禍釁天爾年齡焉非一念之知不墮三塗之

苦臣忝承道業夙荷慈恩無伸報謝之門薄示薦羞之意虔遵科式爰舉醮章仰祈大道之慈悲曲宥幽魂之罪戾偕冷風而滌濯洒甘露以清涼聽大法而入寶珠歌洞章而朝金闕雖形骸朽腐生前無羽化之功庶神識逍遙死後遂仙遊之樂

代道士薦母

非天何戴久資覆育之恩無母烏生曷報劬勞之德仰瀆蓋高之聽俯陳罔極之恩儻賜憫憐庶通悃悞伏念

臣頃緣母氏偶遇厄年百藥不靈莫救沉疴之虐九霄
雖遠不違疾痛之呼輒懷請禱之私果獲更生之賜尚
擬親年之永稍稽心諾之償屢易寒暑兼懷喜懼日月
逝矣嗟桑陰之不留人壽幾何恨河清之難俟未遂蹟
繫之報俄興風樹之悲罪逆所延歟號何及爰自重泉
之隔遽驚百日之臨媿殘喘之尚存痛神魂之何在恭
命羽士虔修醮科用酌昔日之鴻恩載助茲晨之哀薦
異資道蔭薄報母慈仰祈上帝之哀矜曲宥幽魂之罪

戾渡仙橋而瞻玉像永脫九幽聽大法而入寶珠遐超
三界

代萬叔夏孫先覺二首

居高聽邇不遺疾痛之呼施厚報輕薄致苾芬之薦輒
殫哀悃叩叩大鈞庶憑三界之妙香上達九霄之雲路
竊念臣頃以糟糠之偶適罹拆副之灾痛裂肺肝幾受
蝮蛇之禍誤形夢寐竟非熊虺之祥事不止於驚姜罪
深憂於訟鄙賴敷號之有應信蒼昊之非遙遂於困踣

之餘輒沐保全之賜雖梵音數誦寃未息於三生而大道垂休經靡勞於八說顧蒙恩之有日思報本之無門恭致羽流虔修醮式奉蘋蘩之至潔獻螻蟻之微誠仰祈上帝之是臨俯冀百神之咸集恩施幽隱敢期七祖之飛昇福及賤微永庇百年之伉儷

大道難名孰識虛盈之數微臣有感默垂覆宥之仁輒殫悃悞之私仰黷高明之聽伏念人生以得男為喜孝子以無後為憂嗟冷族之不蕃痛私門之薄祐伯氏早

亡而竟無嗣續微臣不肖而獨守宗桃爰從合姓而來
深負傳家之念瓦已三弄弧纔一懸方居襁褓之中屢
致憂厄之患曾伸懇禱曲荷保全敢忘讓謝之修少答
生成之賜恭憑羽士式舉醮科用陳螻蟻之誠肅奉蘋
蘩之薦允賴洪鈞之庇永延孺子之年頭角有成箕裘
不墜坐消餘孽毋煩命百藥之名克嗣先盟尚冀有二
雛之慶

代周元授

非蘋蘩蕓藻之至潔雖君子不能薦神儻齋戒沐浴之
或修雖惡人而可祀帝遙望九霄之雲路恭焚三界之
妙香願伸悃悞之私仰報穹隆之德伏念臣某有生匪
直為德最涼善不積以致殃動輒成於得咎世人欲殺
陰幸其灾造物見憐屢赦其罪頃緣闔族咸遇厄年屬
土木之頻興懼陰陽之有犯妄懷請禱果致蒙休逮蒲
柳之既衰覺門闌之多囂殘生薄祐存遭橫逆之憂孀
女來歸復染沉疴之虐幾縲紲之不免分溝壑之是填

訴哀痛於玄微荷恩私於影響念呼天於前日數至于
三思反本於此時心宜克一恭延羽士虔舉醮章寓禮
意於庶羞達精誠於有昊百神咸集列宿來臨居高之
聽甚明臣既蒙恩於疇昔禍淫之理不昧臣當改過於
將來

代萬叔永

疾痛倦辱則呼天幸延殘喘齋戒沐浴以祀帝用醇大
恩輒殫悃悞之私仰黷高明之聽伏念臣比緣暮景頻

遇厄年病侵犬馬之軀殃及箕箒之妾雖肘後之方屢
閱而竈中之藥不靈蒲柳非堅憂風霜之莫保糟糠至
賤懼溝壑之是填窮故懷反本之心病斯有請禱之事
自伸丹悃果荷洪休命咸獲於更生喜旋臻於勿藥不
特脫負薪之慮又將舒就木之期顧茲感戴之誠敢怠
必芬之報恭臨仙宇光啓道場仰期上帝之是臨俯冀
百神之咸集俾萬靈之蒙福願七祖之超生赦臣無窮
之罪愆寬臣有限之日月洪惟有昊願常居高而聽之卑

庶使餘生尚可耕前而耘于後

又代黃詞

肖茲形質既蒙持載之恩禱爾神祇又荷生全之賜敢
伸愚悃恭叩地靈伏念臣蒲柳之姿易凋桑榆之景多
患頃與糟糠之偶咸罹屯蹇之災深疑獲戾於幽明將
恐併命於朝夕心妄懷於請禱體咸脫於沉疴顧茲螻
蟻之誠敢忘豺獭之報墮耕而登黍稷澗采以奉蘋蘩
倘蒙后帝以見歆庶俾百神之不吐頭童齒豁尚貪須

史之生山高水長難報博厚之德

代劉仁叟

痛則呼天意不忘於反本病斯請禱情蓋迫於為親輒
殫悃幅之私仰黷高明之聽竊念臣某茲者伏緣父某
齒當遲暮體卧沉疴屢費醫巫未去韓公之瘡徒勞祝
史莫禳齊景之疢職雖勤於問安效未收於嘗藥深懼
桑榆之暮遽凋蒲柳之姿靜念厥愆孰貽伊感豈私門
之多釁故陰譴之莫逃或因丘壠之營有戾陰陽之理

塹山谷而下傷地脉冒刑禁而上犯天星積邪氣以奸
和致衰年之在疚臣忝居子職忍視父憂退思請命於
百神孰若祈哀於上帝恭憑羽士虔醮設科少伸螻蟻
之誠薄致蘋蘩之薦仰祈洪造默覆湛恩赦臣門已往
之愆賜臣父更生之命居高聽邇誠倘達於彼蒼禍散
殃消喜佇看於勿藥

疏文

雙蓮潭請水疏

旱魃為虐千里起望雲之心精誠所加匹夫有動天之
道輒殫哀悃仰叩靈潭切以歲丁六甲之窮夏有四旬
之旱嘉穀垂成而一旦俱槁蒼生失望而寸心欲焦曩
憑三寶之威神遠詣雙蓮之靈宅求一勺於淵潭之內
謁百神於廟貌之間雖旬浹之已踰曾禱祈之莫應甘
雨彌閣亢陽益驕豈斯民積霧之所招抑上帝至誠而
難感人無為命惟填壑之是憂龍亦何心乃在淵而弗
救志未伸於一請理必至於再求伏願走雷霆於俄頃

之間興雲霧於呼吸之際亟下霈然之澤坐消太甚之
灾霖此槁苗尚有勃興之望救茲黔首免為轉死之徒
倘副微誠敢忘大賜

明慶教院請講疏

釋迦說法于祇樹遂一朝地闢天開智者起教於台山
乃千古風清月白自鶴林之寂滅暨佛壠之淒涼孰知
覺路之歸罔識真心之在有資上德為發微言共惟某
人大講師脫迹儒門潛心釋典躬服名師之訓屢從哲

匠之游大明止觀之淵源深悟法門之旨趣緇林駐錫
聳頭角於東靈法座橫經振聲名於西掖久握元珠而
自照願施甘露以旁霑況潛澗之道場實慧光之古剎
念久虛於蓮席思大振於潮音光我家風還他作者翕爾
羣情咸快如披雲霧以觀天咄哉小子何知可笑蚍蜉
之撼樹因道心之無爭見慈德之有容幸副衆緣重興
佛事

惠政橋施水疏

人惟惠政之懷度橋者有如歸市道多暍死之患得水者勝如挾焚創隙地之數椽汲甘泉之萬斛有資好事共結善因分金溪不涸之流為樂邑無窮之施利霑居室奚煩鑿井而得泉澤及路人不必望梅而止渴

館頭覓官路疏

樂邑江山素號東南之勝館頭驛道實為來往之衝積水潦以傷隄致官私之病涉欲挾泥塗之辱輒興畚鍤之工爰資橐金以伐山骨共植無窮之利寧計不貲之

財將使寧不陷車遂無六十里之患庶幾岸弗為谷何止三千年之長

小小園覓花疏

伏以名利區區何足為樂園林小小聊以自娛彭澤之徑方開草堂之花殊少廣求異品遍扣名園輒效柳州因談笑而為故事無忘宣子願封植以比甘棠

淵源堂上牌文

伏以黨有庠而家有塾幸逢教化之興伏其几而升其

堂敢負淵源之學況剡溪蘊秀之地有汝南家訓之存
誥誥子弟之趨庭亶亶父兄之樂教堂軒並建齋室宏
開集羣彥以論文館同襟而恢義富而能教事實可書
遂廣采於篇章用一新其標榜伏願上牌以後益須富
學竚看輝聲襲謝客之風流猗蘭擢秀種實家之陰德
丹桂聯芳凡屬游從共增歡慶

祭文

祭孫子尚文昭

係開封人紹興乙丑
卒于會稽年三十二

嗟嗟子尚君亡矣夫千里風傳真乎偽乎謂果然耶君
氣如長虹貌如明珠才如錦綉語如瓊琚體有四乳之
奇目無再閱之書意造物者不偶然而生之必將富貴
其形軀豈青春之方壯不霑一命而云殂謂果不然耶
鄉人西還訃音不虛謂君初諧和鳳之鳴日更晦朔之
餘死於鵬告賈生之月而地於勾踐之故都嗚呼悲乎
吾平生道義之故人果為異鄉之新鬼乎自聞訃兮十
日晝痛哭而夜歔歔豈無友朋知心已無白雪陽春歌

誰和予流水高山彈誰聽予君歸不留孰為我徒長記
與君從容聯席於金谿之日涕泣分袂於白沙之初付
悲歡聚散於一夢閱十年如過隙之駒我匏繫於簫臺
君萍飄於太湖渺天涯與海角歎影隻而形孤前年仲
春書傳鯉魚謂將從伯氏於天台必命駕而尋吾念君
不負於一諾固嘗辦鷄黍而掃吾廬望車音兮杳杳鬱
吾懷兮不舒豈千里之期不可審而行止有非人所能
為者歟吾亦謂二人齒髮未衰而後會必有豈知一別

而死生殊途天乎痛哉天乎痛哉某罪逆殘生緣經未
除不獲効巨卿之執紼訪元伯之輶車慶招提之可以
寓居意神魂之或在奠一束之生芻

祭姑丈季公佐

嗚呼吾鄉老成日就凋零尚餘幾翁疏若晨星數點光
芒旋覺微滅天不憖遺公又奄忽耆年舊德孰在鄉評
紛紛後生無復興刑嗚呼哀哉仁者宜壽公壽未足六
十四而公在化為促善人有後公後必興佩詩服書蘭

玉滿庭人皆謂公德如燕實五桂未芳公弗及候我獨
謂公死日可瞑含笑九原少遲子榮人或謂公死有遺
恨仲婦且歸公弗及見我謂不然仲子最賢必全孝道
以終三年嗚呼哀哉昔我先姑獲配君子云胡不淑壯
年而死我從稚髮出入公門誨我撫我如姑尚存公今
既亡我寧不涕前人風味傷哉孰繼念公永歸無復還
期公神在天思莫見之公魄在棺愛莫起之奠以永訣
疇堪此悲

族人祭十四伯母文

嗟吾宗之薄祐兮綿七葉而未昌保先業而不墜兮猶
不滿乎數房念伯父之在昔兮能勤儉以自將獲夫人
以內助兮措生涯於小康家克成而莫享兮痛嗣續之
早亡化門戶而為異姓兮咎往慮之匪良鬼求食而卒
餒兮嘆後祀之淒涼幸孤女之僅存兮歸體魄於故岡
羅棺前而設拜兮酸子姪之腑腸悼吾宗之不幸兮抱
無窮之痛傷

又代女壻

嗚呼生女不生男古人不幸而發此憂愁無聊之語也何吾先丈人之積善有夫人為之配而亦罹此苦也先王制禮大宗無後必繼之以小宗之子也何後世之甘心滅絕而莫知乎此也舉千金之產而俾之異姓此猶未足異也忍使祖宗求食而餒同乎若教之鬼也夫人腹生五女某幸娶其季也平昔登門曲荷恩私念圖報之無地也矧使折其囊橐取其膏腴以為已利也今焉

曲盡送終之禮而不敢辭亦固其義也擗踴哭泣哀而送之者乃而孤女與吾僚壻也靈輿前邁道路感傷不見孝子慈孫為夫人出涕也

祭毛叔度主簿文

嗟嗟叔度誰謂子乎死也哀哀蒼天禍何至乎此也以子之聰明俊邁軒昂磊落固宜致遠大而躋顯仕也豈青春方盛一分官况遽為新鬼也昔顏回生不遇時而短命賈生處非其地而傷生王楊盧駱之徒器識不足

以遠到死固其理也子有回之善而時非東周有誼之才而地非長沙有王楊盧駱之文而器識過之奈何年亦不多乎顏賈而命僅同乎四子也而今而後吾知造物者之無情有才者之無命富貴壽夭多不在此而在彼也昔吾年未冠而子方志學黃卷同披短檠共照相期以古人相待以國士也童子雕蟲我拙子工子果凌雲我終不能繼風騷之靡也事業麟經我疏子明子果得泉我終不能探謹嚴之旨也招仙賦詩瀑水聯句子

歌陽春我必和之以已詞之鄙也我愚我褊動多忤物
子慧而寬能容我失我嘗自目曰狂而命子以達子不
以有餘者自多我常懷不及之媿也賢闕行藝蘭省聲
名子先着鞭我猶未能攀逸軌也邇年以來出處稍異
我困羸粮子棲枳棘偶家難之各丁幸殘生之未滅方
期握手以更弔誰謂訃音之驚耳也子有親喪在殯慈
母在堂兒幼而孤婦少而孀意子目不及瞑而銜恨無
已也然子讀古人之書達死生之理窮達壽夭等一夢

耳假令彭聃其年伊呂其位大都不過數十寒暑亦無此身矣子固宜安其不幸從先大夫於萬里也

又代周元授

嗚呼悲夫子胡為乎而止於斯也人孰不為子悲莫甚乎老人之私也我昔識子於年少期子之不凡知子之貴不疑也已有息女年猶未笄命執子之箕帚奉子沃盥之匱也子方蜚妙譽於賢闕馳大名於省闈人爭貪於擇嚮子不慕於牽絲也一諾千金斷然不移子之風

誼非古人其誰為吾鄉不振賴子以光輝吾門薄祐賴
子以扶持也婦翁女壻義同半子而我於子情實倍之
也去歲仲春赴官丹丘吾嘗遣吾兒以隨也瓜期未半
坐席未煖遽罹家艱而零丁以歸也人皆謂子年方少
壯志方遠大佇俟翔禽千里奮飛也豈期一疾奄然長
逝而莫追也子病之革念欲見予而予不知也及扣門
而子已絕心懷不見之恨涕有無從之揮也子髮種種
子鬢星星死灰其心槁木其形今又失子生亦胡為也

吾當忍死畢子後事勉吾女以共姜之節勿奪其志庶
無恨於柏舟之詩也子之孤始三歲俟其免水火脫襁
褓教之育之會有成人時也亦有天地鬼神臨在上質
在旁吾言不欺也

祭潘先生文

紉袴不餓儒冠誤身吁嗟先生乃爾遘逆何負於心何
罪於人何命之不淑何天之不仁何才之豐而命之嗇
何氣之壯而志之湮先生之文也浩乎如韓愈之無涯

先生之才也飄然如謫仙之不羣弄翰染墨也李義山
之險怪締章繪句也庾開府之清新蕭瑟乎東野之寒
寂寞乎原憲之貧鬱鬱乎鄭廣文之坎軻栖乎杜陵
老之酸辛北牕萬言曾不直一杯之水豈非命壓人頭
蓋不許其伸也耶二十餘年淹徊海濱孰學道而不先
生是師孰擇善而不先生是隣主盟吾鄉之絳帳作成
吾黨之斯文紛紛後生頭角璘珣夫豈自賢非教曷因
施厚報輕痛何可陳投老西行脩嘗險勤小戰輒歟大

期遽臻戲侮有挪揄之鬼除穰無爵壘之神酒杯多握手之交蓋棺無慟哭之賓幸有嗣之可托賴葭莩之懿親某等樞衣最久辜恩最甚今日之奠已不及哀矣徒傷血淚之沾巾

祭陳景韶文

嗟嗟吾丈命止斯耶半世而亡云胡不嗟吾丈平生真可人也胡為天年不少相假昔在妙齡父兄早亡惻然一身遂克肯堂生涯既饒襟義彌篤指廩高風鄉人所

服賓客過門歡笑迎逢賢如北海尊常不空酒杯流行
詼諧談謔坐有陳公人誰不樂晚年風度比迹東山自
謂醉翁不在酒間賤子區區曾獻衷曲紙上遺言猶蒙
記錄嗚呼哀哉皎皎雙珠俊秀有餘人謂君家三世詩
書指人有日振耀門閭公胡不留以待安居嗚呼哀哉
春秋方盛自知必死手書後事以貽厥子易箦之際了
然可喜古之達人未必如此賤子不肖辱知最深疇昔
登門曲荷開襟拜違經年忽奉訃音臨棺大慟涕泣能

禁

寒食祭始祖文

昔我始祖西來自杭避地擇所山林遯光今二百年子
孫寢昌善苟不積流何以長鬱葱佳城爰在此崗乃與
夫人高下異藏祔塋累累喬木蒼蒼寒食拜掃禮修故
常糾合宗族共酌一觴

祭始祖母文

昔我始祖來居左原夫人相之以有子孫歷載二百墳

墓尚存中間偶遺幾忘大恩訪而得之了非妄言乃與
始祖高下異墳茲遇寒食披荒薦蘩庶使百世不忘本根
祭孟丙文

嗟嗟孟丙吾幼兒也七歲而亡吁可悲也汝生而眉目
分明神氣清秀骨有伏犀之奇也聲音琅琅語話了了
而世事稍稍能知也吾與朋友講習二兄侍立而汝必隨
也吾徒數十人汝類能識其姓第名字退而品藻之於
其私也吾謂汝早慧如許他日必未易量豈意止於斯

也吾之所飲恨者翫汝之病救汝之遲也初亦謂汝起
止輕健豈數日之間遽至弗支也生於村落所恨苦者
無妙藥良醫也致汝無辜由我之罪茹苦抱痛無窮時
也當汝之死家禍方稔而仲兄之勢尤危也吾方倉皇
驚怖不得盡下殤之禮以葬汝遠墳三匝以苦汝情雖
鍾而恩以虧也汝今死已百日矣汝母方獲視汝之墳
而我方獲祭汝以詞也汝昔在襁褓娒婆鍾愛汝今附葬
於側魂魄必有依也汝父母親戚朝夕哭泣以思汝夜

常夢寐以見汝冀汝有再生之期也天地鬼神儻憫汝之橫天釋我之罪愆使汝復為吾子以慰莫景之思也汝或夤緣未斷魂識有知當隨父母以歸也

祭支夫人文

某稔聞夫人有勤儉起家之德享富壽康寧之福昔嘗過其門閭恨無登堂之階邇來夤緣多幸獲預葭莩之末始登門於去年之春然是時夫人之次孫寢疾已革不敢伸候見之禮逮去年之夏來哭夫人之孫之喪始

獲見於稠人之中然時方哀痛雖欲奉觴而不可得姑少遲之以俟他日今乃遽聞夫人之凶訃匍匐而來而夫人已蓋棺矣某以通家之故期歲之間足三及門一以問疾二以弔喪竟不獲少伸為壽之願乃以一觴而奠訣人世如此吁可歎哉

代祭宋彥才文

二首

念吾鄉之耆舊所餘纔二三人嗟浮世之年齡自古稀七十者况善人相繼而淪沒俾後生亡得以依歸盡爾

傷心潛然出涕惟公望傾士論德冠鄉評妙齡接步於
青衿白首游心於黃卷殖千金之產治生不羨於陶朱
戲五綵之衣色養未多於萊子優游窓几組繪篇章有
員外之遺風恨錦袍之不奪繼廣平之餘韻賦梅花而
甚工讀方外書有文選學唯以一經而教子不求五斗
以折腰尚期羔鴈之招幾在桑榆之脫豈意海漚之遽
滅堪嘆朝露之易晞過眼百年轉頭一夢某居聯桑梓
世續葭莩蚤從蘭玉之游曾快雲天之觀家聲不振媿

同北阮之貧人品甚微謬辱東牀之選拜門闌之未幾
俄簪履之遽遠徒然肝膽之摧莫遂丘山之報撫棺有
覩掩袂何追聊伸半子之恩薄致一觴之奠

嗚呼人生百年兮長短幾何吾鄉故老兮零落無多月
落天池兮夢斷南柯丈人一往兮迅若飛梭明朝理玉
兮湖山之阿月魄冰魂兮誰共吟哦輶車屈道兮薤露
興歌臨棺奠別兮涕泗滂沱

代諸生祭周仲翔母文

嗚呼孟母不生三遷教孺婦人義方麟踈鳳稀伊昔汝
南家聲尚微刀筆是傳詩書罔知夫人登堂潛歆默歛
曰我有子非儒曷歸仲子妙齡秀目踈眉喜謂良人茲
廼佳兒罄我橐金給爾師資手調熊膽志在荷衣皎皎
明珠長浪益奇業勤藝苑心探聖涯高視雲霄平步可
期前日賢闕小敵偶遺千里言旋慈顏不怡謂胡弗留
再戰秋闈去雖倚門歸欲斷機賢哉夫人前烈可幾雅
志未酬浮生遽遠蓋棺不瞑有識興悲嗚呼哀哉某等

忝交蘭玉屢拜賓輝賢非房杜濫對酒卮尚期他日一
鶚高蜚鯨吸賀樽歡動庭闈孰謂一朝人事成非隻鷄
斗酒泣奠靈帷嗚呼哀哉男子剛腸不妄涕洟今日潛
然為賢母揮

代諸生祭陳元佐父文

嗚呼十載之前吾邑父兄汨于流俗聞見弗明詔厥子
弟為利是營惟刀筆是傳惟儒冠是憎雖有良能莫克
自興孰先義方孰始過庭樂善惟公教子以經矯矯家

督早蜚俊聲茲千里西征惟公命是承豈私是名實惟
親是榮凱奏未旋禍變忽嬰忍哉蒼天慘莫之勝所孤
者不啻天地之重所圖者僅比毫髮之輕是詩書教子
反貽公之恨而桑弧蓬矢之志足以明孝子之痛懲嗚
呼哀哉某等辱蘭玉之與游獲誨言之屢聽痛斯辰之
盖棺想銜恨而弗瞑奠一觴而永訣故血淚其如傾

代祭李夫人

近世以來人益天促吾鄉數月頻着弔服老而逝者壽

罕及於稀年少者胡為名亦書於鬼錄惟今日之弔夫人乃堯舜盛時之哭蓋夫人之壽幾九齡有內外重孫之滿目且富而康庶幾五福此固吾鄉近世之所無而夫人之所獨某母黨之親也惟夫人之最尊而某之不肖也又聯姻於華族施及兒輩葭莩相續三世婚姻恩重義復冀慈顏之長在庶壽觴之頻屬胡今日之登堂奠生芻之一束如夫人之一死兮顧無可憾而親戚之心雖眊彭猶未足

代諸生祭周仲翔父文

嗚呼人孰無生生而不淑有媿於生亦孰不死死非正
命有媿於死惟靈生為善人死於牖下是生死之間兩
無所媿也然靈脫然於習俗之中慨然破黃金之簾諄
諄然有意於教子也矯矯令嗣天姿秀偉力學而工文
自修而近厚亦一鄉之善士也奈何鼓篋賢闕較藝秋
闈未遂厥志而靈不能忍死數年以待三釜之養此某
等所以為靈興恨於此也

代人祭族弟文

嗟吾宗之薄祐兮如吾弟其無多方妙齡兮確有志乎
琢磨將興家以詩書兮變習俗而丘軻苟歲月之少假
兮持此心而匪他庶頭角之成就兮奚蒼穹之足摩云
乎命之不淑兮遽不起乎沉疴凋朱顏於鼎盛兮脫綠
葉於庭柯驚好夢於須臾兮委青春於逝波嗚呼雙親
在堂兮鬢髮皤孤兒孀婦兮柰若何凜霜風於玄朔兮
埋爾骨於山阿酌一觴而永訣兮覺老淚之滂沱

代祭萬夫人文

嗚呼婦人五福世罕有也天畀夫人獨何厚也東平先生以絃誦先吾鄉以節行高一時賢士大夫爭求見之而夫人實為其婦也扶風府君溫厚儒雅至今鄉里稱為長者而夫人實為其偶也蚌腹生珠藍田出玉一門四傑如唐之穆夫人有子實昌厥後也禁齋竒才東牀佳士喜入門闌如唐之李夫人有女實獲鸞友也履柔順於一身達孝慈於六親夫人之德固無咎也閭閻冠

乎鄉閭齒髮逮乎稀年夫人富壽固兼受也湖山之南
佳城鬱葱夫人之藏當不朽也某忝葭莩之末欽聞懿
德亦云久也今夕何夕奉茲寔宴登堂灑涕酌斯酒也

代祭何升老文

惟公名久聯於仕籍出處可書行素著於鄉評始終無
玷門闥鼎盛蘭玉蕪榮方期壽杖之迎遽棄板輿之養
不遺一老莫贖百身某早緣桑梓之私重結葭莩之好
徒深感德未遂承顏况遘阻於江山每濶踈於音問忽

聞凶訃俄喪吉人已嗟七日之非薄致一觴之奠慈容
莫覩老淚徒揮

代祭宋元明文

嗟嗟元明君死已乎然歟否也謂果然耶君風貌堂堂
世事了了以幹盡克家而門庭昌阜何天與之才智而
嗇其年壽也謂不然也吾入君之門胡不見其歡然而
迎登君之堂胡不聞其笑語之聲七尺之軀乃塊然而
在柩也嗚呼君果死矣吾鄉黨親戚中堂堂了了如君

者不多有也君之父乃吾之舅吾之母乃君之姑而吾同氣之姊妹又為君之偶也吾與君再世通家游從最久情好綢繆尚相期以白首也君雖健如許而溘先朝露況吾蒲柳之姿又安能保其悠久也吾來撫君之棺弔君之母與我之妹哀君之諸孤涕無從而奠以一卮之酒也

代祭萬叔永文

嗟嗟我公德尊一鄉宗族協和門閭阜康六子趨庭一

桂先芳豈唯一門鄉閭之光賀客在廬弔客倚牆哀哉
吉人命胡不長家君與公情好相忘婚姻世修如謝與
王一二年來游宦遠方恨不親臨元伯之喪家書有命
遣酌一觴

代祭余夫人文

惟靈節著孀居興共姜守義之誓志在宗祀有叔姬歸
國之風生涯獨盛於慶門智巧反踰於男子恩尤深於
婢獲庇潛及於孤遺於家曰能在婦為哲早歲克勤於

負子莫年方慶於抱孫孰知驚悸之間遂致沉疴之甚
一疾不救六旬遽終某等忝通孔李之家兼脩魯衛之
好雅欽婦德夙荷眷私華屋重來未改堂萱之綠玉容
不見但聞風樹之悲觴豆薄陳涕泗交隕

梅溪前集卷十八

欽定四庫全書

梅溪前集卷十九

宋 王十朋 撰

雜著

井光辨

予家之東南有井覆以屋其水清而甘冬溫而夏寒雖
大旱水僅盈尺而泉脉不枯井方不及丈然比他井為
差巨當先祖之世鄉人目吾居為大井頭王家則是井

也固見大於鄉人矣予闢家塾於井之南紹興庚午季夏之夕僕夫汲而歸以井有光告予徃視之隱隱熒熒如燈如螢如光芒之星不知其果何物也意者魚鱉之族其鱗甲文理晦於晝而絜於夜耶或螺蚌之腹產明珠以自照耶其在物理或之有也惑者好語怪匪妖之則祥之矣予故以物理辨之二十五夜會趣堂書

四友錄

語曰君子以文會友予文會梅溪有友四人焉皆佳士

也然各有少疵羅文性堅剛而貪墨毛穎工文詞動如人意而不耐久楮先生為人潔白而輕薄子墨客卿有漸磨之功而好變白為黑也四友與予文會久矣予常取其能而不議其疵數年間客上庠陪俊游果賴四友之力然予老矣四友方進未休他日竹帛間慎毋相忘子當掩予疵如予今日之不廢子也庚午六月丙寅書

讀婁師德傳

婁師德教弟耐事弟曰人有唾面潔之乃已師德曰未

也潔之是遠其怒正使自乾耳予嘗詠史作師德詩云
忤意由來勿校難誰能唾面自令乾直須事過心平後
方服婁公度量寬予性褊急常欲書婁公傳於座右效
古人佩帶之戒偶閱書遂錄其事昆弟朋友間有坐予
失者宜書紳焉則事雖大於唾面心自然清涼矣

題卓

吾貧好作文苦於無書可閱好寫字苦於無紙可書遂
於貧中撰出一術以卓為紙以肺腑為書淨几無塵日

書數百字吾之無盡藏紙也心之精微日出數百言吾之無盡藏書也從予游者有童子數人勞之以研墨之職授之以所書之言日從吾為無盡藏游也顧謂童子曰吾老矣無盡者有時而盡汝能記吾言使不如几上字滅沒否乎童子曰唯庚午季夏二十八日書

論文說

有客與王子論文謂王子曰子以今文況昔文亦加進否乎予應之曰新文之進予則不知也但每閱舊文背

必汗焉耳客曰見舊文而汗背進莫驗於斯也使天假子之年將不一進而以他日見今之文汗又浹背矣子不見君家名勃者乎滕王閣序最膾炙入口落霞與孤鶩齊飛秋水共長天一色之句當時以為神殊不知此乃少年麗豪之氣俳優之雄者以勃之天資英秀不使早死其文之進殆未可量他日見所謂神句者寧不汗背耶韓退之文章之古者後世莫得而疵之然感二鳥賦乃少年所作學識未逮故有二鳥不如之歎李漢序

其文為篇什之首非深知退之者也予善其說遂退而記之

讀蘇文

唐宋文章未可優劣唐之韓柳宋之歐蘇使四子並駕而爭馳未知孰後而孰先必有能辨之者

不學文則已學文而不韓柳歐蘇是觀誦讀雖博著述雖多未有不陋者也

韓歐之文粹然一出於正柳與蘇好竒而失之駁至論

其文之工才之美是宜韓公欲推遜子厚歐陽子欲避路放子瞻出一頭地也紹興庚午七月上澣日讀東坡大全集於會趣堂因題於後

雜說

為善易能不言難過人所不免文之則小人也

孟子言仁者如射以其發而不中不怨勝已也孔子曰君子無所爭必也射乎射有勝負爭之端也君子獨能以揖遜終之遂至於無爭宜怨而不怨當爭而不爭此

孟子謂之仁而孔子謂之君子也彼有無爭而爭自起無怨而怨自生真小人之不仁者哉

名之所在人所必爭而同忌也能避人之所爭樂人之所同忌斯可謂之君子掩惡揚善朋友之道語曰尺有所短寸有所長予所短多矣然於交友中常道其善不道其惡是亦寸中之長者昔姜渭叟能言之姜死矣無知我者渭叟負逸才豪氣者也而不修細行惡有所不掩亦朋友之罪姜之念予盖有所激云

人有毀已已亦毀之何其不長者也予雖未嘗揚交友之惡然性褊躁不耐事聞人毀已則氣形肝鬲往往亦斥其過於稠人廣衆中言既出口悔心遂生然駟不及舌矣因思韓安國對魏其武安之言自知其非長者遂書以為戒

靈鳥說

鳥之為禽性靈而意忠每預知吉凶而啞啞以告小人聞其鳴則唾罵之鳥不以唾罵而廢鳴可謂忠矣范文

正公謂人有言兮是然人無言兮是然者也君子聞鳥
鳴則恐懼修省潛銷禍患於未萌人遂以鳥鳴為無驗
忽之為不靈也殊不知鳥能警於未然之前君子能戒
之於未形之際是鳥之忠計既行而智名不可得而聞
矣告之不戒而凶著於形迹則鳥之鳴驗是吳之子胥
也告之能戒而禍銷於兆朕則鳥之智隱是漢之張子
房也鳥之告豈有二哉所聽有不同耳書院之東隅有
鳥連日羣噪若有所告者此君子恐懼修省時也作靈

鳥說

夜虹見

紹興庚午七月十六夜山月初吐有長虹見於西廡光
白踰時而滅人以為白虹異之予謂是虹之異在時不
在色虹見於晝蓋影日而成色宜青紅或白則為異其
見於夜也影月而成白乃其宜耳然虹多現於朝暮間
在乎欲雨欲暘之際未有影月而現於夜者茲其所以
為異與姑志之以俟能言災異者辨

待士說

有言邑大夫不待士者予曰子何從知之曰有訟於庭者箠楚之辱及焉予曰此士之不自待非大夫不待士也為士者服詩書精素履聖賢之是師臭味之與游謹門戶時租稅忍焉以省訟慎焉以遠禍俾足迹不及於公門而官吏稀識其面目雖使柳下惠之弟為邑大夫焉能辱儒冠而陷之虎口耶使貌焉而士行焉而市旁午里巷而惡少與爭競非分而獄訟以興朝鑽刺以識

面暮求判以欺愚雖使周成王之叔父為邑大夫詎可望其施吐握之禮耶大夫非能重士也士實自重非能輕士也士實自輕顧其自待者如何邑大夫何責焉既以答告者遂書為吾黨之戒

雜說

孟子曰生我所欲義重於生舍生而取義可也嗚呼人之所甚畏者死也義之所在死有不足畏者惟不畏死之人可以成天下之大義立天下之大節享天下之大

名

名與謗常相隨因名獲謗因謗獲名雖韓退之猶是也
原毀曰事修而謗興德高而毀來非因名獲謗歟進學
解曰動而得謗名亦隨之非因謗獲名歟有名而有謗
不若無謗而無名古之哲士必避名非避名也乃避謗
也

君子小人不難見即其報施之間而觀之則肺腑之隱
洞然不可逃矣陳平受賞則不忘魏無知白敏中得志

而擠李德裕君子小人之用心其厚薄如此

賈誼過秦論班固公孫弘贊韓退之進學解真文中之傑也予少時誦之至熟今為昏愚所奪心能記之口不能道聰明不及於前時宜古人之興歎也賈誼賦過相如揚子雲不知也柳子厚平淮西雅過韓退之子厚自能知之子厚之文溫雅過班固退之之文雄健過司馬子長歐陽公得退之之純粹而乏子厚之奇東坡馳騁過諸公簡嚴不及也

唐宋之文可法者四法古於韓法奇於柳法純粹於歐陽法汗漫於東坡餘文可以博觀而無事乎取法也

讀進學解

韓退之進學解蓋揚子雲解嘲班孟堅賓戲之流也然文詞雄偉過班揚遠矣予無退之文章學識而一二事與之合公不見信於人私不見助於友與冬暖而兒號寒年豐而妻啼飢是也自志學之始喜誦是文太山北斗仰亦勞矣二十年間跋前疐後無其職而有其窮每

欲效顰作文以送之又無怪怪奇奇之筆也紹興庚午
七月二十二日書

三不能戒

不善文者宜秘不善書者宜楷不善言者宜省予不善
文而不能秘不善書而不能楷不善言而不能省此其
所以獲諂之多者歟今焉知過而能通戒之矣然有時
乎不能秘不能楷不能省者文能秘於憲几著述之私
而不能秘於場屋進取之公書能楷於優游學習之時

而不能措於處處應答之頃言能省於心平無事之日而不能省於氣形肝鬲之際烏能使文無媿於不秘書無媿於不措言無媿於不省

書歐陽公贈王介甫詩

翰林風月三千首吏部文章二百年老去自憐心尚在後來誰與子爭先此歐公贈介甫詩也介甫不肯為退之故答歐公詩云他日畧曾窺孟子終身何敢望韓公由今日觀之介甫之所成就與退之孰優孰劣必有能

辨之者予謂歐公此詩可移贈東坡贈者不失言當者
無媿色

大舜善與人同說

大舜善與人同非與人同為善也蓋能與人同而不立
異耳古之獨行之士皆好立異而不與人同如申徒狄
之介於陵仲子之廉尾生之信屈原之清皆能為人所
不能為然非可傳可繼之法君子不取焉彼以立異為
有過於人而不知適所以自小也舜取諸人以為善盡

事親之理以為孝由孝悌之道以為仁義是皆人之所
可為者舜亦從而為之人之所不可為舜亦不為之矣
此所謂善與人同然舜善與人同而衆人卒不能自同
乎舜者何耶舜其即同乎人者而行之不息此所以為
大聖人衆人一作焉一息焉甚者一暴而十寒焉初與
舜同而卒與舜異非舜之不同乎人人自不同之耳子
貢贖人而不受金是子貢之不與人同也魯人獵較孔
子亦獵較是孔子善與人同也賢人好與人異而聖人

常與人同舜孔子為大聖人者非由乎異而大者同焉而已矣故曰大舜有大焉又曰大哉孔子語曰晏平仲善與人交孟子曰大舜善與人同善者能也語意正相類

論語三說

孔門弟子有顏回者聖人許之以仁者也有有若者其見道似聖人者也有曾參者悟聖人一貫之道者也於是作三月不違仁說以賢顏子作有若似聖人說以辨

其似聖人者非貌作一貫之說以辨其所以告門人之意

上智性仁其次修仁其次假仁性之者無心於為仁而所為無非仁者得之於不思不勉之間而從容於顛沛造次之際猶水之不噓而自寒火之不呵而自熱也寒也熱也仁也非水火與聖人之性也哉噓而寒呵而熱修而仁則出乎人者矣惟賢者能修之於終身之久其至也與性之者同衆人假之於日月之暫及其久也則

真偽之情見矣顏回雖孔門之高弟然於仁也非性之者也克已復禮而為之也孔門弟子孰不欲為仁也哉然假之於日月之暫而不能好之於終身之久聖人觀人亦必久而試之使偽為者不能欺於倉卒不備慮之間而真修者亦足以發明於倉卒不備慮之際三月久矣天時變矣而回心不違是終不變矣嗚呼回三月之仁是近而一日之仁也遠而終身之仁也回豈偽為而暫假者哉豈噓呵於頃刻之間也哉說者謂顏子三月

不違仁賢於日月至焉者耳未能以之終身也作三月
不違仁說以辨顏子

論語何以子有子耶柳宗元固辨之矣雖然未知有子
也孟子稱孔子既沒弟子子夏子游子張以有若似聖
人欲以事孔子事之所謂似聖人者蓋必有子之學識
於羣弟子中有一日之長其見道有似吾夫子焉如孟
施舍似曾子北宮黝似子夏之似也世儒以謂貌似孔
子其說陋矣且有子之似夫子而曾子有不逮焉者曾

子嘗以喪欲速貧死欲速朽為夫子之言而有子不然之曾子質諸子游子游曰甚哉有子之言似夫子也子游之徒知有子似夫子素矣所謂似者必有如辨曾子之言之類豈以貌似之故虛欲師事之耶雖然直似之耳欲以事孔子事之則不可故曾子不許之而有子未嘗居師之位也說者謂不能答弟子之問遂見叱而退盖好事者為之辭以誣有子耳然世皆知顏子之後有曾子而不知有子者亦回參之亞匹也序論語者知之

故首記夫子之言次記有子之言又次記曾子之言未必言之次第如是也其必寓推尊之意焉以謂夫子既沒之後其道可尊其人可子其言可法者莫先乎有子曾子也或曰子以有子為回參亞匹夫子曷不以好學稱之如稱顏子又曷不以一貫之說告之如告曾子且不與四科之列何耶曰夫子何特不稱有子亦曷嘗有一言以稱曾子也何特不以一貫告有子亦曷嘗以是告顏子也稱之告之當時有未必盡記後世有未必盡

知者焉有子曾子在孔門年皆最少其不預四科之別者未必從夫子於陳蔡故也曾子之後有孟子故曾子之道益尊有子之後無門人故有子之道無顯然孟子嘗稱其智足以知聖人又記其似聖人與羣弟子欲以孔子之事事之子游稱之於戴經弟子尊之於論語亦足以發明有子之為人矣而學者未之知也作有若似聖人之說以辨有子

闕

書富家翁逸事後

萬序明之手錄雜文一卷其首篇乃馮當可所記富家翁逸事也富家翁兄甲者未必知書觀其處昆弟之間雖知書者所不能為進之孔門其閔子之徒歟馮記其事而逸其姓第曰兄甲而已他日史官作宋孝友傳書其事而闕其人當與齊魯大儒同發揚子雲之歎也予忝知書且為人兄有媿於不知書之甲多矣然心實慕之願學焉吾家他日或無乙之婦庶幾遂其所慕之心未可知也顧謂萬子曰汝東平先生嫡長孫且其家世

業儒非富家翁比豈不能為甲所為耶子為人子弟固非以是責子也然既錄其事必有意於為甲者甲不難學少損好利之習則人皆甲矣予之書是命表弟余壁全之研墨因以其事語之二子從予游皆妙齡而秀者其家皆知書過於富家翁者予故以是勉之紹興庚午季夏二十五日不孝子王某書

記蛙

予有鞋布體而麻質其弊甚十趾不能以自藏有蛙乘

罍而入蟄於鞋頗間予不知也會昏暮如廁而蛙忽鳴
俯而視地無所見既行而又鳴予始疑之既就几席而
坐足每動則閤閤然有聲以指摸之有蠢而動者予愕
然未能物色其類呼童子燈之脫鞋而微露一爪乃蛙
也命童子出之躍而去東郭先生衣弊履穿貧甚矣然
未聞有蛙乘罍而蟄者以是知予之貧又過東郭一等
然鞋非可蟄之所蛙託身誤矣使其不能自鳴幾死於
足間予去歲嘗和韓退之答柳柳州食蝦蟆詩以戒同

舍果能止殺是蛙也豈以予不殘其類故奮身而來託
將以脫蟲蛇吞噉之禍於一時耶予亦幸而不踐之不
然幾乎避禍而得禍也感而至蟄而免自鳴以求全蛙
亦有知矣勿以其蠢焉而愚之人能持無害物之心而
物以其類至能持無害人之心人其有不至者耶時紹
興庚午孟秋七月十四夜書

記人說前生事

予少時有鄉僧每見予必謂曰此郎嚴伯威後身也予

不曉所謂既而訪諸叔父寶印大師叔父曰嚴闍梨字伯威汝祖母賈之兄吾之舅氏且法門之師也博學工詩文戒行修飭有聲江淞間為士俗所推重汝父母恒以無子為憂禱求甚力至政和壬辰之正月吾師卒汝祖一夕夢吾師至其家手集衆花結成一大毬字顧汝祖而遺之曰孝祖君家求此久矣吾是以來忽不見是月汝母有娠至十月而汝生吾師眉濃黑而垂目深而神藏兒時能誦千言喜作詩人以汝眉目及趣好類之且

符所夢又謂吾師死之月而汝受胎也故云予幼從學
鹿巖人有指予眉垂目藏而斲之者表大賈元達曰此
子眉目類吾伯嚴闍梨他日能文未可知也然嚴闍梨
智慧名德卓卓如許縱未脫輪回當復生人間世為大
善知識胡為於滅度之後鍾成迂愚魯鈍之性現此窮
薄困苦相耶予嘗寫字作文詒寶印叔父叔父曰人言
汝吾師也文僅似之字乃爾不同耶嚴闍梨尤工筆札
予最不善書故也紹興庚午七月二十日因作文寫字

兩俱不佳媿而曰嚴闍梨汝前生食蔬何多智今生食肉何許愚也用說之

梅溪前集卷十九

欽定四庫全書

梅溪前集卷二十

宋 王十朋 撰

行狀

東平萬府君行狀

君諱世延字叔永世為溫之樂清人曾大父惟監大父周父鴻皆晦德不仕君幼警悟敏記誦初屬文思捷而佳為師友所奇年十四而孤奉母謹甚處家事若成人

舍法中游郡庠業修行飭蔚為善士宣和間邑大夫興鄉校以鄉先生鄭君邦彥主之鄭學術淵粹為時名儒從之游者以百數君一日謁同志會其課諸生戲即其題涉筆而就鄭見之撫几歎曰之人詞藻於是一第唾手取爾然君以兄弟終鮮志頗甘旨訖不事進取抱才不試鄉人惜之性寬博與物無忤尤善宗族每先其急難遇長幼慈愛均壹無纖芥嫌隙族衆多間有違言君周旋其間開釋以理衆皆媿服協比如初由是闔族內

外咸欽而愛之稱為長者善治生蓄而能散親故有不
振者每綱紀其家其弟子有美質困不能自業給飲食
師資費以教之處女貧無以歸躬為擇配廩而遣者凡
數人居之左右細民寒族資衣食埋葬者數十家緇素
叩門隨所謁而獲者不計歲凶廩飢每為富室倡教具
以館賓席無虛日也篤於教子嘗葺屋數楹讀書其間
厚禮以致名師訓督點竄之勞率分其半長子庚最美
才始冠游太學君勉之以詩曰莫放山鴈簣終教井及

泉唐益自勵果優中攷選連預薦書屢為多士先聲譽籍籍用上舍免省登進士科次子庠亦以妙齡預鄉貢萬氏以絃誦先里閭歷四世儒冠益盛業賢闢舉進士者數人登科第自唐始樂清自舍法罷閱二十年無舉於鄉者里巷斬之邑人復取鄉貢自庠始先是監察御史睢陽李君藹扈駕南巡聞君有鄉譽訪其居名其軒曰必大且賦詩極言之至是二子俱有成人以為榮咸謂君種德樂教之報且嘉李之先知君夙有喘疾晚歲

彌劇瀕死語不亂巍坐正色而卒實紹興甲戌十月二十有三日也年五十有八鄉里聞訃無不傷嗟初娶孫氏先君二十四年而卒繼室以趙氏子六人庾左迪功郎處州縉雲尉次曰庠曰廙曰廓曰庶曰唐孫男三女二庾與庠既以儒學名家餘皆服義方其進未量鄉人以君有陰德且多男子比之燕山竇氏恨其不足於壽不獲盡見云君仁而好施志於濟衆者未艾也嘗割膏腴三十畝儲其入以濟親戚之貧者死之歲語諸子曰

吾為是恨未廣自是而後宜資其人歲一易之庶幾志周且枚舉其所當與者家之西距大江實為要津勢端而惡涉者病之君叔祖東平先生始傾家資跨江為橋濟人於險垂六十年往來蒙其利俄一夕燼於火東平子主簿君欲新之未遂而卒君毅然以橋為任然事難役鉅既捐已資以半其費又經營其餘於鄉黨間以佐之橋成有日矣而君卧病彌歲屬續語不及他顧謂諸子吾以橋累若等矣諸子涕泣請繼志領而瞑君雖早

厭場屋未嘗廢書每開卷意有所會必標識以謹不忘
所為詩文雖不多皆平淡造理峻潔可愛尤屬意於簡
翰雖貽子弟不率然作也卒之又明年諸孤卜以春正
月十有九日葬于岐山之陰泣血相謂曰吾父以善人
君子稱於鄉其潛德有足書者將乞銘於薦紳先生以
永厥垂宜得之其詳者狀而授之庶乎其不誣以屬某
某萬出也每登門辱顧為厚且與庾同舍上庠又獲與
諸子游蓋知其詳而不誣者雖無陋其何敢辭謹狀

張府君行狀

君諱端弼字廷直姓張氏溫之樂清人曾祖迪祖攷父
瑤世蓄潛德不慕祿仕君資俊邁好學問慷慨喜議論
敦尚氣節偉然男子也舍法行肄業泮宮月書歲攷累
成優校以行藝職學事領袖諸生眊眊有聲侵尋於仕
塗矣會更科學子解散君歎曰仕與養不能兩全浩然
懷歸奉偏親以孝聞初先業廣大重以兵火業寢微君
通材經畫有條未幾生事大振富甲鄉邑然雅重義槩

恥為俗子富務周旋宗族親舊有以窘告濟之無難色
邑學再建與出財力居多仍率先割膏腴以養士每歲
之春發廩以賑窮民質貸踰年不取其息有負責者多
折券不復問性樂善里人有登第者喜如已得閔其貧
每資給之雖萬金不吝也好賓客坐席常滿極飲不倦
杯行健語笑年雖及而銳氣不衰所居地為邑之屬鎮
間有不逞曹聚譴譟君凡諭以理有不肅者張目掀髯
厲聲叱之咸股栗畏避威不以勢人尤難之喜教子姪

命師友必以賢答以殊禮闢廬舍規模宏壯或謂君有
令名何室之美曰吾非以自奉也為他日子孫容車馬
會食客之地爾其心期如此養高閭閻足不及州縣未
嘗以姓名干典謁汙訟牒士論譴之聞有巧造請捷犇
走無日不數於公門者心鄙薄之常舉為後生戒晚景
益曠達不以財利經心見為善者喜見顏閭譽而勉之
以親志好佛二弟俱從空門學為飯萬僧開義井以侑
善云疇昔少有疾預知死期一夕牡丹冬開人以為祥

君謂花非其時對之悵然賦詩見意既而感疾朋舊問之談笑如平時俄盥手正衣冠偃卧而逝實紹興二十四年十二月五日也享年六十有六子二人攄挺皆業儒女三人長歸進士宋翰餘未嫁君挾所負氣蓋一時俛首田園非其志也每觸事感慨興懷學有經術尤邃於易少以事進取既蓄而不施行所學於家處利害得喪之際裕如也識者謂其詣幾深之理好商榷文史工詩章語逸意新有作者風君於鄉黨為前輩某初稔其

名未之識也一日過柳川遇焉不以後進見鄙欣然命舟同泛而歸既登堂獲奉文字飲於顧遇不薄矣君沒之明年諸孤卜以十二月十一日塋於里之桂峯祖塋之側長子攄以書來告曰子於吾先君有一日之雅宜狀其行吾將乞銘於立言君子以藏諸幽以垂諸不朽某謝非人至於三不獲命遂采諸鄉評編而次之謹狀

賈府君行狀

公諱如訥字元辨其先福州長溪人五世祖徙溫之樂

清曾祖皓祖靖父奭皆有潛德不仕公溫雅愷悌持重寡言為兒時巖若成人十二歲而孤事後母至孝撫育弟姊恩意均壹母病涕泣嘗藥及卒執喪如禮伯母錢性嚴子姪有過必痛繩之公善承順未嘗忤意在諸子中最以謹厚稱初伯父奭以絃誦先里閭從兄弟愚如晦俱美才有聲庠序間公尤嗜學每謂弟如石如規曰吾二兄才名如許若等可不自勉耶以身率之故二弟皆力學能自立如規既冠學益進公勉其游太學且躬

任其家事厚資給之務成其志及舉進士捷音至時兄如晦同戰藝公意其俱中喜甚既而聞其不利鬱鬱不樂賀者方集公卻之曰吾兄親老方藉此以慰其意今見黜何賀我為人服其不私如規今尉建昌軍廣昌縣以德譽取重縉紳公之教也公善治家井井有法不務兼并而生產日肥性仁慈尤睦宗族見貧者心憫之常發廩以濟每言彼吾宗也吾忍獨溫飽也有尤窘者四族人以膏腴三十畝賑之仍給穀暨牛資其播殖又捐

百畝飯僧徒之往來者及分惠里人之饑者凡割田二頃餘而金穀之惠叵計謁弓踵門必周卹之至解衣以贈其敦宗好施盖天性也鄉人燕其宗恥以貧賤者與公曰是豈兩姓耶每家宴合踈近長幼貧富均禮舅氏家不振悉力贍之歲時登其門省事如父母去必感泣舅卒厚禮以葬公素友愛兄弟異居非其志當析財命宗人區處未嘗顧視務推遜以化媮俗季感其德復義聚至今樂教子弟屢延致名儒厚其禮終始周旋之喜

賓客館無虛日雅不好飲遇賓醉則為之極歡敦尚禮法遇人無厚薄必盡恭泛愛鄉黨至所交必擇長者寡嗜欲不好殺喜與釋子游談無生之理務忘身世不幸嬰痼疾仁而不壽享年纔四十有二以建炎三年五月九日卒遺言有私負者悉棄之遠近聞訃無不涕泣娶同邑陳氏處士景芳之女姿婉淑奉姑以孝謹稱始奩具頗厚公喜周急而夫人不吝故公得以私田活其宗數百指陰德在人為多盖夫人之助云後公六年而卒

年四十有九男一人曰循以業進士克守家訓與季父同居幾三十年服勞不憚鄉里難之女一人歸表姪王某孫二人公與夫人喪久在殯弟縣尉君嘗言吾兄嫂事吾母盡孝吾當擇地改塋吾母以兄嫂祔焉屢以下後得邑之左原其崗維吉躬治墳塋以奉窀穸紹興癸酉秋循飲泣謂某曰吾將以冬十一月十有七日合葬吾父母欲丐銘大手筆以發其幽光子盍狀之某不佞獲以通家子自幼登公門荷知遇不淺及公歿又辱為

子堦知隱德為詳嘗訪遺事於故老咸曰公仁者也今無是人矣某遂撰次所聞俟賢而有文者書之謹狀

周府君行狀

公諱瑜字公寶先世姑蘇人也高祖避五代亂徙居于剡曾祖荀祖惟父過皆不仕公為人純厚質直介然能自立以孝友聞於鄉治家有法遇長幼以禮閨門之內肅如也宣和中魔寇犯邑人倉遽奔匿公獨擁親柩噉號聲徹閭里冒兵刃扶護以畢窀穸朝夕悲涕不忍去

墓側兇徒相戒曰無驚周孝子賊平卒無恙公喜儒學
嘗闢家塾數十楹延四方名士以淑諸孫又製夫子暨
十哲坐象畫七十二子於一堂俾崇奉之大書其側曰
爾其親師友之淵源就功名之烜赫決日必設具以集
之親究其能否有勵業者喜見顏間面加獎諭冀其成
就稍怠愼則諄諄戒敕俾之自勉由是咸自力於學紹
興庚申秋孫汝士預薦書乙丑歲世修肄籍太學丁卯
秋汝士汝能世則聯名鄉薦明年汝士登進士第鄉人

榮之公喜周急視飢渴者如已每盛夏分命皂隸當往來之衝烹泉以救暵窮冬集境內飢民施以金穀遇歲歉發廩賑貸命諸子悉寬逋負剡之南有鉅溪實為要津行者病涉公首創浮梁以濟其子繼之至今蒙其利初先君嗜佛公嗣志彌篤凌晨焚香端坐披閱藏經歷四十寒暑手錄因緣幾百卷每以所得語諸子借示勸戒剡有名剎遭兵寇燔毀無餘公割已貲一新其棟宇時私第猶未築家人以為言公曰茲邑人植福之所渠

可後耶僧徒德之祠公於佛舍旁欽事以報公又闢別館飯貧士及緇黃之流滋久不厭其樂善好施出於至誠初不求人知而稱道者不去口其見重於人如此公狀貌魁偉見者以為異人自中年鰥居不再娶屏嗜慾務養精神平生未嘗服藥既老顏如嬰兒視聽不衰好事者爭欲求見以叩養生之術晚苦足疾諸子和藥以進公卻之曰死生命也何以藥為兒女涕泣以請忽然弗顧會孫壻高世綢以赴調告遠公曰吾某月日行矣

至期沐浴易衣而坐神色如平時謂諸子曰吾即行若輩宜自勉言畢奄然而逝實紹興二十一年十一月十有六日也享年八十有八公薄於世利初以勤儉自守不廣貲產自諸子既壯悉以家事付之積數年富甲一邑公視之恬然不以經意晚景門闌益盛身壽康寧每歲旦暨誕辰讌坐高堂子孫說說環列戲綵甥壻無慮數十人爭先為壽剡中以周氏為慶門言五福者以公為備公娶里人孫氏先公三十二年卒男三人長仁承

節郎次侁承信郎婺州永康縣監酒稅後公一年卒季
億先公七年卒女四人長適同邑吳宗次適劉陞次適
房先厚次適過諤其夫皆早死諸女孀居終不改志男
孫九人世光汝賢汝士左從政郎汝弼早卒世修汝能
世則汝礪世南皆業儒女孫六人長適同邑進士盛卞
次適秦州助教過煥次適成忠郎通州支鹽高世綱次
適進士商汝霖次適右迪功郎徐與夔次適右修職郎
潭州醴陵縣尉姚寔曾男孫十有二人曰之元之純之

文之綱之彥之茂之奇之翰之才之望之邵之美曾女
孫十有二人長適進士史之才次適左迪功郎明州慈
溪縣主簿陳嘉善餘尚幼某無似獲與公之孫世修同
舍上庠道出剡溪嘗登公堂獲承謦欬之餘他日再至
而公逝矣癸酉秋公長子仁移書謂某曰吾將以十二
月十八日塋吾父於邑之方山鄉馬鞍山之原祔先夫
人之隴也子辱與吾兒游吾父平生之詳願狀其行吾
將乞銘於士大夫以藏諸幽某辭鄙陋不獲謹撰次所

聞如右謹狀

潛澗嚴閣梨塔銘

師諱處嚴字伯威姓賈氏温州樂清人也父靖居鄉以長者稱母萬方娠一夕夢黑龍自天躍而下俄化為道人入其家及產師有異相幼警悟不凡經史過目輒成誦舅東平先生規邑之名儒也試以對隨口應答大奇之少長忽不如輩母強之卒不從一日游精舍歸白其母曰兒疏食居俗非所宜願出家學佛惟夫人割愛遂

往里之明慶院禮僧知性為師既落髮受具游歷郡刹
初學律未幾習天台教觀慨然歎曰吾邦僻在海隅見
聞不廣遂之錢塘依南屏臻公聽天台大部明法華諸
經時學者尚編錄務相詰難師聽法罷端然默坐同輩
問之發明師說了無遺誤因謂之曰文字分別馳騁法
相吾不能為遂遠游禪林訪先輩老宿叩擊玄旨師志
節高學識超邁杖錫所至道眼相契為多會有以座首
命之者師曰吾宅心名利外異逍遙自適詎能為人役

耶於是西游帝都觀伊洛南周旋江淮間凡名山水叢
林巨剎靡不至時道潛思聰二僧與東坡居士游聲名
籍甚咸與師善數以篇章往來師博學詩文尤典重且
工書有晉宋法或勸以所作謁縉紳求知已師笑曰古
之桑門上首與士大夫游非求之也道自合焉爾故終
身不以一字干謁識者高之元祐間還永嘉寓淨光大
雲開元諸寺其徒翕然歸之扣門請益者屢相躡也師
訓以本業外復以詩書子史導之凡經指授者咸見頭

角時開元建護國天王殿命師作記文辭雄偉太守范公見之稱歎良久命刻石行於世元符初歸故山誅茅結廬循除蓄流自號潛澗賦詩鼓琴以自娛有古人林下風師有辭辨長於講釋鄉里巨室欲屈師講經莫能致因具法筵集廣衆預設巍座俟師至與衆迫之師匆遽就席闡揚奧旨緣飾以文音吐鴻亮聽者驚悅明慶自創業幾七百年無文蹟可攷師首為撰記并書之時稱二絕郡守張公平聞其名以禮致之躬受楞嚴大義

初以僧正命師又命主禪席皆力辭之每詣府手提一笠未嘗肩輿人以師為府座所厚因屬以事師正色峻拒府政有不便於民者委曲以告守改容聽之瑞安令呂公勤自號湖海道人邂逅師喜甚與俱還邑築庵於廳治後園命師居之為留三宿而去邑令丁公湛每訪師談道終日忘返晚景絕人事惟精修淨業喜諷誦楞嚴圓覺維摩光明法華等經精熟如流靜夜孤坐焚香暗誦琅琅之聲出於林表嘗手書法華光明二經以報


母德又書華嚴經八十卷首末不懈字法益工弟子宗
要游學姑蘇俄以書督其歸未幾師得疾遽終政和壬
辰正月二十日也享年五十四僧臘三十九至三月闍
維得舍利數百顆明瑩如珠明年九月植塔於故廬之
後以遺骨并舍利葬焉師於佛學無不通曉尤深於禪
而接物以教故以闍梨著名平生製述甚多藁隨毀失
圖寂後弟子收拾遺文編成二卷人有得其片紙皆寶藏
之其文翰見重於人如此弟子宗要師號寶印傳天台

教住永嘉之妙果克世其業法孫德純亦傳法於郡之
龍翔某大母氏師之同母姊也寶印師蓋某之叔父師
歿之歲而某始生自兒時稔聞德名恨不逮見今四十
餘載矣始獲以叔父之命銘師之塔不敢以鄙陋辭銘

曰

師之道儒律禪教咸臻其要師之技歌詩文翰咸極
其致師之節公卿大夫不屈而謁師之訓子傳教觀
孫傳心印師之廬左琴右書山高澗迺師之塔明珠

遺骨千古不滅



梅溪前集卷二十